

BISER 32

JU Osnovna škola "Behaudin Selmanović"



Sarajevo, juni, 2022.

Sadržaj

TAKMIČENJA I POSTIGNUĆA UČENIKA	4
TAKMIČENJE IZ ODBOJKE	5
TAKMIČENJE IZ GEOGRAFIJE	6
ŠKOLA SKIJANJA ZA ŠESTE RAZREDE	7
OPĆINSKO TAKMIČENJE IZ ATLETIKE	8
IZVJEŠTAJ SA TAKMIČENJA	9
OPĆINSKO TAKMIČENJE IZ NOGOMETA	10
NAŠA PRVAKINJA	11
IN MEMORIAM: IVICA OSIM	12
AKTIVNOSTI TEHNIČKE I INFORMATIČKE SEKCIJE	14
VANNASTAVNE AKTIVNOSTI - SPORTSKE SEKCIJE	15
OGLEDNI ČASOVI	16
DAN ARMIJE REPUBLIKE BOSNE I HERCEGOVINE	22
POSJETA TUNELU SPASA	23
IZLET	24
POSJETA POZORIŠTU MLADIH	25
DAN MATERNJEG JEZIKA	26
LITERARNI RADOVI	27
VELIKE RADINOSTI NAŠIH NAJMLADIH	34
HIPPO OLYMPIAD 2022	35
5 NAJIMPRESIVNIJIH VODOPADA NA SVIJETU	36
OBILJEŽAVANJE SVJETSKOG DANA VODA	38
DAN PLANETE ZEMLJE	39
ZANIMLJIVA BIOLOGIJA	40
EKOLOŠKA SEKCIJA	41
SVE MOŽEMO ZAJEDNO	42
EKSKURZIJA	43
MATURANTI	44
ISKRICE MUDROSTI	46

IZDAVAČ

- Urednik: Edina Žugor - Šalaka

- Tehnički urednik: Šeherzada Tahić Zahirović

- Nastavnici saradnici: Selmir Fehratović, Nermin Imamović, Semina Vileš - Šipo, Ermina Poljić, Hajrija Velić Izeta Rahić, Muhamed Pjevo, Elvira Imamović, Jamina Gujić, Elvira Uglješa, Emira Tucaković, Sanela Dučić, Edita Trnka, Mubera Ibrović, Elvedin Mehić, Ermina Muslić - Hubijar, Sanela Drinić, Lamija Čelik.

- Učenici saradnici: Edina Muharemović, Ćato Nejra, Lamija Omerović, Oglečevac Ema, Sajra Fazlić, Sajra Murtić, Lejla Ibrović, Merima Šalaka, Emman Čavčić, Rijad Hadžić, Lamija Zeba, Lamija Šabanović, Hana Perjan, Amna Bajrić, Eman Kadrić, Asja Šabeta, Amila Karić, Lunah Vrabac.

DRAGI NAŠI UČENICI!
PRED VAMA JE NOVI BROJ ČASOPISA BISER.
VJERUJEMO DA STE GA JEDVA ČEKALI I DA ĆETE UŽIVATI U ČITANJU ISTOG.
ISPUNJEN JE RAZNOVRSNIM SADRŽAJEM KOJI JE REZULTAT VAŠEG I NAŠEG RADA TOKOM CIJELE GODINE.
NADAM SE DA STE PONOSNI NA SVOJE REZULTATE PA VAM OVOM PRILIKOM ŽELIMO ČESTITATI NA ISTIM I ZAŽELJETI UGODAN RASPUST I PUNO SREĆE I USPJEHA U NAREDNOJ ŠKOLSKOJ GODINI.
VAŠA REDAKCIJA!



ČUVAJ GA

Gledam kako prolazi,
I u srce tvoje ulazi,
Vjetar joj vijori kroz sjajnu kosu,
A ti je gledaš kao zlatokosu.
Na te mislim.
Pa dobro razmislim,
Kako čovjek može da zavoli,
Da svašta srcu dozvoli.

Mora mi obećanje jedno ispuniti,
Da te čuva i miluje svakog dana,
A ja ću dušu svoju oporaviti,
I preživjeti orkane i tornada.

Edina Muharemović VIII-1

PROBLEM

Ime čudno zvuči, ali se u njemu istina krije, da li sam ja problem ili ono što me okružuje?
Da li zvijezda kada se ugasi, kriva sam ja? Ili hladni život što joj oduze trag.
Da li sam ja kriva što ljeta više nema? Ili zemljin okret oko crnog svemira.
Da li... da li si ti problem ili neko drugi?
Da li ljubav prema drugima gajiš ti, a oni okreću ti leđa, ama baš svi. Da li ti bolja osoba si iz dana u dan, a oni propadaju kao kameni grad...
I možda ti nisi problem, možda svima želiš dobro, a oni ne znaju da to vrata.
Ipak je dobro činiti dobro!

Ćato Nejra, VI-2



JU OŠ "Behaudin Selmanović", Sarajevo

Viteška 6
71000 Sarajevo
Bosna i Hercegovina

tel: 00387 33 780 020
tel/fax: 00387 33 674 376
www.osbs.edu.ba
e-mail: os.bs@bih.net.ba

ZABILJEŠKE - DNEVNE AKTIVNOSTI ZA ŠKOLSKU 2021/2022. GODINU TAKMIČENJA - OPĆINSKO

R.br.	DATUM	NASTAVNIK	PREDMET	UČENIK/SEKCIJA	MJESTO
1.	21.09.2021.	Fehratović Selmir	Tjelesni o.	Malonogometna sekcija	3.
2.	29.09.2021.	Fehratović Selmir	Tjelesni o.	Atletska - EKIPNO	2.
3.	29.09.2021.	Fehratović Selmir	Tjelesni o.	Kurjaković Ali - 60 metara	1.
4.	29.09.2021.	Fehratović Selmir	Tjelesni o.	Šuvalija Emina- 60 metara	1.
5.	29.09.2021.	Fehratović Selmir	Tjelesni o.	Kurjaković Kanita-skok u dalj	3.
6.	29.09.2021.	Fehratović Selmir	Tjelesni o.	Begić Kenan-skok u dalj	3.
7.	11.03.2022.	Tahić Šeherzada	Informatika	Turčalo Faris i Rijad Gušić	5. Ekipno
8.	16.03.2022.	Vileš-Šipo Semina	Geografija	Brajanović Farah	3.
9.	16.03.2022.	Vileš-Šipo Semina	Geografija	Turčalo Faris	4.
10.	16.03.2022.	Vileš-Šipo Semina	Geografija	Čavčić Emman	5.
11.	21.04.2022.	Fehratović Selmir	Atletika	Adna Maksumić (60m)	1.
12.	21.04.2022.	Fehratović Selmir	Atletika	Ilhana Šabanović (skok u dalj)	1.
13.	21.04.2022.	Fehratović Selmir	Atletika	Dalal Husić (200m)	1.
14.	21.04.2022.	Fehratović Selmir	Atletika	Tarik Bećirović (200m)	1.
15.	21.04.2022.	Fehratović Selmir	Atletika	Kanita Kurjaković(skok u dalj)	2.
16.	21.04.2022.	Fehratović Selmir	Atletika	Hana Gušić (200m)	2.
17.	21.04.2022.	Fehratović Selmir	Atletika	Melda Maslo (60m)	2.
18.	21.04.2022.	Fehratović Selmir	Atletika	Kenan Nogo (vortex)	2.
19.	21.04.2022.	Fehratović Selmir	Atletika	Ammar Curić (skok u dalj)	3.
20.	21.04.2022.	Fehratović Selmir	Atletika	EKIPNO	1.
21.	26.04.2022.	Poljić Ermina	Tehička k.	Bakir Ferić	3.

TAKMIČENJA - KANTONALNO

R.br.	DATUM	NASTAVNIK	PREDMET	UČENIK	MJESTO
1.	31.03.2022.	Vileš-Šipo Semina	Geografija	EKIPNO	1
2.	31.03.2022.	Vileš-Šipo Semina	Geografija	Turčalo Faris	4.
3.	31.03.2022.	Vileš-Šipo Semina	Geografija	Čavčić Emman	6.
4.	31.03.2022.	Vileš-Šipo Semina	Geografija	Brajanović Farah	18.
5.	27.04.2022.	Hastor Mubera	Engleski j.	Turčalo Faris	3.



KANTONALNO TAKMIČENJE IZ ODBOJKE

U utorak 10. maja 2022. godine održano je kantonalno takmičenje iz odbojke gdje su učestvovalе i učenice iz naše škole i na dostojan način prezentovale školu.
Nastavnik: Selmir Fehratović

Općinsko takmičenje iz odbojke

U srijedu 13. aprila 2022. godine održano je općinsko takmičenje iz odbojke gdje su učestvovalе i učenice iz naše škole i na dostojan način prezentovale našu školu.





Kantonalno takmičenje iz geografije

Na kantonalnom takmičenju iz geografije, održanom 30.03.2022. godine u prostorijama "Richmond Park International Secondary School", učenici IX razreda naše škole: Turčalo Faris, Emman Čavčić i Farah Brajanović pokazali su odlično znanje i osvojili ekipno 1.mjesto. Nastavnica: Semina Vileš - Šipo

Takmičenje tehničke sekcije

Dana, 26.04.2022 održano je općinsko takmičenje iz tehničke kulture. Našu školu su predstavljali učenici Šišić Nejla, Ferić Bakir, Begić Zajko, Musić Mirza i Barjaktarević Hamza, od kojih je najbolji rezultat osvatio Ferić Bakir osvojenim trećim mjestom iz teoretskog dijela takmičenja među šestim razredima. Zahvaljujemo se svim učenicima na trudu i radu koji su uložili predstavljajući našu školu na takmičenju.

Nastavnica: Ermina Poljić



ŠKOLA SKIJANJA ZA UČENIKE ŠESTOG RAZREDA



U periodu od 21.02. do 16.03.2022.godine , uz druženje i odličnu atmosferu svi učenici šestih razreda naše škole su uspješno prošli obuku i savladali osnovne elemente iz skijanja, u pratnji nastavnika tjelesnog i zdravstvenog odgoja Selmira Fehratovića. Još jednom sve čestitke učenicima naše škole na ozbiljnom pristupu i radu tokom trajanja obuke.

Bravo drugari.

Nastavnik: Selmir Fehratović



Općinsko takmičenje iz atletike

U srijedu, 29.09.2021. godine na poligonu Atletskog kluba „Novi Grad“ održano je općinsko takmičenje iz atletike, u okviru projekta Postani atleta, gdje su učenici naše škole ostvarili sjajne rezultate. U ekipnom plasmanu osvojeno je izvanredno 2. mjesto ekipno, dok su u pojedinačnom plasmanu ostvareni sljedeći rezultati:

1. Mjesto – Kujraković Ali (8-1) – trčanje na 60 metara
1. Mjesto – Šuvalija Emina (8-2) – trčanje na 60 metara
3. Mjesto – Kujraković Kanita (6-1) – skok u dalj
3. Mjesto – Begić Kenan (8-2) – skok u dalj

Za ovaj uspjeh zaslužni su i sljedeći učenici: Čaušević Ema, Husić Dalal, Kulovac Adna, Šabanović Najra, Husejnović Danira, Zuko Adi, Musić Kerim, Suljagić Adin, Bećirević Ajdin, Pašić Bakir, Muslić Danin, Prljača Ajdin, Pediša Šejma, Aganović Berina.

Nastavnik: Selmir Fehratović

IZVJEŠTAJ SA TAKMIČENJA

U četvrtak, 21.04.2022. godine na atletskom poligonu SC Safet Zajko a u organizaciji AK "Novi Grad", održano je općinsko takmičenje iz atletike za učenike 6.razreda sa područja općine Novi Grad pod nazivom " Postani Atlet", gdje su učenici naše škole ostvarili sjajan rezultat osvojivši 1.mjesto u ekipnom plasmanu, dok su u pojedinačnom plasmanu postignuti sljedeći rezultati:

- 1. mjesto - Adna Maksumić (60m)
- 1. mjesto - Ilhana Šabanović (skok u dalj)
- 1. mjesto - Dalal Husić (200m)
- 1. mjesto - Tarik Bećirović (200m)
- 2. mjesto - Kanita Kujraković (skok u dalj)
- 2. mjesto - Hana Gušić (200m)
- 2. mjesto - Melda Maslo (60m)
- 2. mjesto - Kenan Nogo (vortex)
- 3. mjesto - Ammar Curić (skok u dalj)

Velike čestitke učenicima na postignutom uspjehu kao i na dostojanstvenom predstavljanju naše škole tokom takmičenja. OSBS
Nastavnik: Selmir Fehratović



OPĆINSKO TAKMIČENJE IZ NOGOMETA

U utorak, 21.09.2021. godine, na sportskim terenima centra Safet Zajko, održano je općinsko takmičenje iz malog nogometa.

Učenici naše škole ostvarili su sjajan uspjeh zauzevši 3. mjesto ekipno u konkurenciji 15 osnovnih škola sa područja općine Novi Grad. Osim diplome za 3. mjesto, učenik naše škole Ismail Kaldžo je proglašen za najboljeg golmana turnira.

Nastavnik tjelesnog i zdravstvenog odgoja
Selmir Fehratović

Za ovaj uspjeh zaslužni su sljedeći učenici:

- Bakir Podrug
- Denin Muslić
- Anel Rahman
- Amar Hodžić
- Ismail Kaldžo
- Salih Gušić
- Benjamin Prašović
- Daris Memišević
- Mahir Katica





NAŠA PRVAKINJA

Hana Perjan, učenica IV-2 razreda OŠ „Behaudin Selmanović“, već sada je uspješna članica karate kluba „Sarajevo“. Svaki turnir za Hanu je poseban i na svakom pokaže hrabrost i borbenost što je rezultiralo odličnim rezultatima i brojnim medaljama. Ono što je posebno raduje jeste da osvajače medalja očekuje poziv selektora dječije reprezentacije Bosne i Hercegovine, gdje će u statusu reprezentativaca braniti boje naše domovine što je svakom sportašu posebna čast.

Svakoj osobi koji se bavi sportom san je postati državnim prvakom ili prvakinjom, a Hana se već okitila tom titulom. Dosada je osvojila 15 medalja za koje kaže da su „tek početak“. Sigurna sam da će svojom upornošću i trudom našu školu, a i domovinu, okтити mnogim medaljama i uspjesima. Našoj Hani želim mnogo uspjeha u predstojećim takmičenjima, s nadom da će imati svijetlu karijeru i ostvariti svoje snove.



IN MEMORIAM: IVICA OSIM

6. maja 1941. godine rođena je jedna od najvećih legendi bh. fudbala, Ivica Osim. Popularni "Švabo" rođen je u sarajevskom naselju Hrasno, a odrastao je u radničkoj porodici. Otac mu je bio bravar u željeznici i povremeno svirao harmoniku, dok mu je majka bila domaćica i aktivistica u Crvenom križu, za šta je dobila Šestoaprilsku nagradu grada Sarajeva. Osnovnu školu završio je u sarajevskom naselju Hrasno, nakon čega upisuje gimnaziju. U srednjoj školi bio je jedan od najboljih matematičara zbog čega je oslobođen mature, te nakon završetka upisuje Matematički fakultet u Sarajevu. Već na prvom ispitu studija matematike, dobija ocjenu devet, i mnogi tvrde da bi, da se opredijelio za nastavak studija umjesto za fudbal, vjerovatno stigao i do nekog univerzitetskog zvanja.



Fudbalska (igračka) karijera

Fudbalsku karijeru Osim je počeo 1954. godine, u omladinskom pogonu FK Željezničar iz Sarajeva. Za prvi tim debitovao je 1959. godine, na utakmici protiv NK Proletera iz Osijeka. Zbog izvanredne tehnike, sjajnog vođenja lopte, efektnog driblinga i dobrog šuta, dobio je nadimak Strauß sa Grbavice i brzo postao miljenik publike. Osim je u Željezničaru proveo devet godina, nakon čega je prešao u holandski FC "Zwolle". Međutim zbog povrede koljena, tamo se zadržao samo tri mjeseca, pa se vratio u Željezničar. 1970. godine odlazi u francuski RC Strasbourg, gdje ostaje naredne dvije sezone, gdje u 58 utakmica postiže 16 golova. 1972. godine prelazi u CS Sedan, gdje ostaje naredne tri sezone, da bi zatim otišao u FC Valenciennes, nakon čega se vraća u RC Strasbourg, gdje završava igračku karijeru.

Trenerska karijera

Nakon završene igračke karijere, Osim postaje trener FK "Željezničar", 1978. godine. Na toj poziciji zadržao se osam godina, u toku kojih je dva puta postao vice-prvak Jugoslavije, nastupio u finalu "Kupa Maršala Tita", te igrao u polufinalu Kupa UEFA 1986. godine, protiv mađarskog FK Videotona. Radi se o utakmici koja se i danas prepričava, ne samo u BiH, nego i šire. Sam kraj pomenute utakmice bio je jedan od najtežih sportskih trenutaka u historiji FK Željezničara i u trenerskoj karijeri Ivice Osima.

Na Ljetnim olimpijskim igrama 1984. godine u Los Angelesu, bio je asistent Ivanu Toplaku, tadašnjem selektoru Olimpijske fudbalske reprezentacije Jugoslavije koja je osvojila bronzanu medalju. 1986. godine popularni "Švabo" postaje selektor reprezentacije Jugoslavije (na čijoj klupi je 2 godine ranije bio asistent Ivanu Toplaku, kada je Jugoslavija osvojila bronzu na OI u Los Angelesu) sa kojim debituje 29. oktobra 1986. godine u Splitu, protiv reprezentacije Turske, pobjedom od 4:0. 1990. godine na Svjetskom prvenstvu u Italiji, Osim je vodio reprezentaciju Jugoslavije do četvrtfinala, gdje na penale biva poražena od reprezentacije Argentine. 1992. godine, Jugoslavija se, također, pod vodstvom Osima kvalifikovala i na Evropsko prvenstvo, međutim zbog početka sukoba u Jugoslaviji, reprezentacija je diskvalifikovana sa prvenstva.

Od 1991. do 1992. godine paralelno sa reprezentacijom Jugoslavije vodi beogradski FK Partizan sa kojim 1992. godine osvaja "Kup Jugoslavije". 1992. godine preuzima grčki Panathinaikos FC, gdje ostaje sve do 1994. godine i osvaja dva puta "Grčki Kup", jedan "Grčki Super Kup", a bio je i vice-prvak Grčke lige, sa jednim bodom manje od prvoplasiranog AEK-a. U julu 1994. godine, preuzima austrijski SK Sturm iz Graza. U toku narednih osam godina (1994-2002.) sa SK Sturmom dva puta osvaja Austrijsku ligu, jednom "Austrijski Kup", dva puta "Austrijski Super Kup", te igra Ligu Prvaka od 1998. do 2000. godine. U januaru 2009. godine proglašen je za "trenera stoljeća", na svečanosti povodom stogodišnjice postojanja kluba. U periodu od 2003. do 2006. godine bio je i trener japanskog JEF Uniteda, sa kojim 2005. godine osvaja "Japanski Kup". Bio je to prvi pehar u historiji kluba. Na mjesto svog pomoćnika dovodi sina Amara Osima, koji kasnije preuzima klub, nakon što je Ivica Osim promoviran kao selektor reprezentacije Japana, 21. jula 2006. godine. 16. novembra 2007. godine, dok je bio selektor reprezentacije Japana, Osim je doživio moždani udar u svom apartmanu u Tokiju, za vrijeme gledanja utakmice engleske Premier Lige. Nakon udara bio je u komi do 3. decembra 2007. godine, a nakon buđenja iz kome prvo što je upitao suprugu Asimu bilo je "Kako je prošla utakmica?" (koja se odvijala u trenutku nesreće).

Kratak period obavljao je funkciju predsjednika Komiteta za normalizaciju F/NSBiH.

Nastavnik: Selmir Fehratović

Aktivnosti tehničke i informatičke sekcije

Novosti iz tehnike i informatike

Dana, 16.03. 2022. godine nastavnica Tehničke kulture, Ermina Poljić i nastavnica Informatike, Šeherzada Tahić su održale zajednički čas informatičke i tehničke sekcije. Učenici koji pohađaju informatičku sekciju su programirali mini računarsku pločicu Arduino koja je pogodna za montiranje na eksperimentalnu pločicu. Tehnička sekcija je spajala elektroničke elemente u strujno kolo. Uz asistenciju nastavnica, djeca su ujedinila znanja iz obje naučne oblasti te su spojili Arduino pločicu sa elektroničkim elementima. Cilj časa je bio da se ukaže na značaj i usko djelovanje ove dvije naučne discipline.



Vannastavne aktivnosti – sportske sekcije



U periodu od 9.5. do 16.5. održana su takmičenja iz odbojke (djevojčice) i košarke (dječaci) u sklopu vannastavnih aktivnosti a u organizaciji općine Novi Grad, gdje su učenici naše škole ostvarili zapažene rezultate.

Nastavnik: Selmir Fehratović

Ogledni čas iz tjelesnog i zdravstvenog odgoja

U četvrtak 28.04.2022. godine u sportskoj dvorani naše škole održan je ogledni čas iz predmeta tjelesni i zdravstveni odgoj nastavnika Selmira Fehratovića sa 7-2 odjeljenjem na temu Sportske igre u nastavi TiZO. Sve čestitke našim učenicima na prikazanom znanju i vještinama.



OGLEDNI ČASOVI



OGLEDNI ČAS NA TEMU "TAJNE SVEMIRA"

9.12.2021.godine, u OŠ "Behaudin Selmanović", održan je ogledni čas na temu "Tajne Svemira."

Čas je realizovan timski, a realizatori su: Semina Vileš-Šipo, Alma Fazlagić i Amra Mizdrak, zajedno sa učenicima odjeljenja IX-1 i IX-2.

Cilj oglednog časa bio je povezivanje geografskih znanja o kosmosu i kosmičkim tijelima, kroz znanja iz fizike i matematike uz primjenu osnovnih prirodnih zakona koji vladaju među nebeskim tijelima. Svemir, kosmos, univerzum ili vasiona je tamni, hladni, bezvazdušni, beskonačni prostor u kome vlada red i poredak. On sadržava svu materiju i energiju koja postoji.



O tome koliko je truda i rada je uloženo u istraživanje i realizaciju od strane naših učenika i njihovih nastavnica, nadamo se da će fotografije u nastavku dočarati barem dio te izuzetne atmosfere.

OGLEDNI ČAS – MOJA OKOLINA



Održan je 19.05.2022.godine u Oš „Behaudin Selmanović“.

Kad vidimo nastavnu jedinicu ovog časa rekli bismo da je preteška za treći razred.

Nastavna jedinica: Kretanje Zemlje (Smjena godišnjih doba, smjena dana i noći).

Od prvog razreda smo se pitali što nam godišnja doba dolaze ranije u odnosu na datume koji pišu u udžbenicima.

U trećem razredu smo shvatili da smo učili pojmove koji nam omogućavaju da možemo razjasniti i shvatiti šta se dešava u prirodi. Postali smo mali istraživači. U našem istraživanju koristili smo razne izvore znanja: Enciklopediju, Faktopediju, Wikipediju i Internet.



KRETANJE ZEMLJE



Zajedno smo se igrali, istraživali i učili.

Dokazali smo da ništa nije teško ako to istinski želimo .

Učiteljica: Emira Tucaković



OGLEDNI ČAS – MUZIČKA KULTURA

U srijedu, 20.4.2022.godine, u našoj školi je održan ogledni čas iz predmeta Muzička kultura. Čas je realizovala Dučić Sanela, nastavnica razredne nastave u odjeljenju III-1.

Nastavna jedinica je bila brojalica „Boc, boc iglicama“, a cilj je bio da učenici prošire znanje vezano za metričko i ritmičko odbrojavanje brojalice i primjene Orffov instrumentarij u odbrojanju.

MALI FILOZOFI

Ove godine u organizaciji TPO-a i Ministarstva obrazovanja održana su tri ciklusa seminara po 2 dana na temu P4C- (Philosophy for Children) filozofija za djecu, (Metoda učenja i podučavanja za unapređenje kritičkog mišljenja).



FILOZOFIJA ZA DJECU

Nakon svakog seminara učenici III-1 i III-2 u školi su održali po jedno propitivanje (čas) na ovu temu. Sami smo trebali osmisliti stimulse i kreirati tok časa. Svaki čas je detaljno pregledan od strane facilitatora koji su vodili ovaj seminar. Obuka učitelja se nastavlja u avgustu.






OGLEDNI ČAS – SEVDALINKA

25.3.2022.godine, u OŠ "Behaudin Selmanović", održan je ogledni čas na temu "Sevdalinka." Čas je realizovan timski, a realizatori su : Elvira Imamović, Nermin Imamović, Mirsad Muharemović i Edina Žugor-Šalaka, zajedno sa učenicima odjeljenja I-1, VI-1, VII-3, VIII-1 i VIII-2. Cilj oglednog časa je bio usvajanje i proširivanje znanja o sevdalinci, kao i razvijanje svijesti o značaju kulturnog nasljeđa BiH.

SEVDAH

Sevdalinka pjeva o treptaju duše, o iskri u oku, tajnama skrivenim, dubokim, znanim samo srcu koje pati i voli, raduje se i čezne, strepi i gori.

Ogrnuto plaštom tajanstva i nemira, uzdaha i sjete, treperi i titra, puni sehare, čuva prohujalo vrijeme



DUŠA

Čas je uspio i da nas odvoji od svakodnevnice barem na trenutak, a time je ispunio još jedan cilj - da nam donese osmijeh na lice i ispuni srce toplinom i radošću.



Ogledni čas – biologija

Nastavnica Hajrija Velić je sa učenicima VII razreda pripremila i realizovala ogledni čas na temu „Ribe“. Času su prisustvovali direktor škole, pedagogica i kolege.

Cilj časa bio je upoznati učenike sa osnovnim planom spoljašnje i unutrašnje građe riba, zdravstvenim prednosima konzumacije ribe, a naglasak je bio i na razvoju svijesti kod učenika o ugroženosti životinjskih vrsta na Zemlji usljed negativnog djelovanja čovjeka, ali i značaju očuvanja prirode.

Ribe

U završnom dijelu časa svim prisutnim se obratio i specijalni gost koji je strastveni ribolovac, naš cijenjeni direktor škole Jasmin Marevac, koji je doprinio da ovaj ogledni čas bude još potpuniji. On je sa učenicima podijelio svoja dosadašnja dugogodišnja iskustva u vezi sa ribolovom, a kao veliki zaljubljenik u prirodu i prirodna bogatstva naše zemlje pokazao nam je svoje fotografije sa različitih lokaliteta, koje nikoga nisu ostavile ravnodušnim i na taj način prenio nam i dočarao samo mali dio one naše bosanskohercegovačke ljepote u kojoj je uživao.



Još nije kasno da se i vi zaljubite u prirodu koja nesebično nudi svoje ljepote, a zauzvrat ne traži gotovo ništa !

Bosna i Hercegovina je nadaleko poznata po čistim i netaknutim vodama. Očuvanje prirodnih resursa je glavni fokus, a vjerujemo da se nakon današnjeg časa u mnogima probudila želja da se i oni nekada priključe određenim projektima i udruženjima za zaštitu okoliša i na taj način doprinesu očuvanju prirode koja nas okružuje i nesebično nam nudi svoje boje, mirise i raskoš.

Ogledni čas – Bosanski jezik i književnost

U četvrtak, 26.5.2022.godine u našoj školi učiteljice Hubijar-Muslić Ermina i Kanlić Enisa su održale ogledni čas iz predmeta Bosanski jezik i književnost. Čas su realizovale zajedno sa odjeljenjima II-1 I II-3.

Nastavna jedinica: Interpretacija književnog teksta „Maslačak i šipurak“ Redžep Hodža.

Cilj je bio da se učenici osposobe za samostalno čitanje, doživljavanje i razumijevanje sadržaja priče „Maslačak i šipurak“, kao ismisla za zajedništvo i saradnju među razredima.

Priču su mogli tumačiti kroz različite zadatke (uočavajući tok događaja, likove i njihove osobine, posljedicu neprihvatljivog ponašanja, formulisanje pouke priči, bogaćenje rječnika, promjene u prirodi kroz godišnja doba, zadatke za rad u grupama kroz međupredmetnu povezanost ...) shodno svojim mogućnostima i sposobnostima kroz rad pojedinačno i u grupi.



Dan Armije Republike Bosne i Hercegovine



Učenci naše škole (55 učenika naše škole, učenika VII i IX razreda), u petak, 15.4.2022. godine učestvovali su u posjeti kasarni Oružanih snaga Bosne i Hercegovine, s ciljem obilježavanja 30 godina formiranja Armije Republike Bosne i Hercegovine. U pratnji učenika su bili nastavnik Fehratović Selmir i nastavnik Nermin Imamović. Sve pohvale za dostojanstveno ponašanje naših učenika.

POSJETA SPOMENIČKOM KOMPLEKSU "ŽUČ"



Dana 19.4.2022. godine, učenici VI razreda u pratnji nastavnica su posjetili Spomenički kompleks "Žuč", a u organizaciji Službe za obrazovanje, kulturu i sport Općine Novi Grad Sarajevo.

Pored obilaska muzejske postavke, učenici su prisustvovali i historijskom času koji je održao neposredni učesnik Bitke za Žuč Nedžad Bublin – Čupo, dobitnik prizanja „Zlatni ljiljan“.

Posjeta Tunelu spasa



U petak, 8.4.2022. godine učenici VIII-1 i VIII-2 posjetili su Tunel spasa. Posjeta je realizovana u organizaciji Općine Novi Grad. Prilikom posjete učenici su prisustvovali predavanju u jednoj od multimedijalnih sala spomen kompleksa, posjetili muzej i prošli kroz autentičnu dionicu tunela koja je otvorena za posjetioce.

Učenici su zajedno sa razrednicima imali priliku da prođu i kroz novih 100 m tunela koji je otvoren za posjetioce. Ovaj objekat je odigrao značajnu ulogu u odbrani Sarajeva i spasu Bosne i Hercegovine.



Trebević

Učenici naše škole, članovi Planinarske družine OSBS, u subotu 26.3.2022. godine učestvovali su u planinarskom pohodu sa preko 200 učenika novogradskih škola. Ovo druženje pamtiće 38 mladih planinara naše škole, koji su o ovom pohodu učestvovali u pratnji učiteljice Elvire Imamović i nastavnika Nermina Imamovića.

Nastavnici: Hajrija Velić i Mirsad
Muharemović

IZLET SARAJEVO-KONJIC-JABLANICA- MOSTAR-SARAJEVO

Preporučujemo posjetu: <https://www.muzej-jablanica.com/ba/>

Učenci naše škole (članovi Historijske sekcije, sekcije Civitas i NUS-a), u subotu 26.3.2022. godine učestvovali su u realizaciji izleta na relaciji Sarajevo-Konjic-Jablanica-Mostar-Sarajevo. Ovaj izlet (posjeta Staroj ćupriji u Konjicu, Muzeju i kompleksu „Bitka za ranjenike“ u Jablanici i Starom mostu u Mostaru) ostaće u sjećanju 25 učenika naše škole, koji su na ovom izletu učestvovali u pratnji učiteljice Elvire Imamović i nastavnika Nermina Imamovića.



Treskavica

U subotu, 30.10.2021. godine, učenici naše škole, članovi Historijske sekcije su učestvovali u tradicionalnom obilježavanju Bitke za tenkove. Članovi sekcije su prisustvovali i historijskom času na lokalitetu Dujmovskih brda. Posjetili su spomen obilježje i mezarje na lokalitetu Dejčića, gdje su minutom šutnje i učenjem fatihe odali počast svim poginulim borcima Armije Bosne i Hercegovine. Počast su odali i na spomen obilježju heroja i komadanta Zaima Imamovića. Učenici naše škole zaslužuju sve pohvale za ponašanje tokom podsjećanja na hrabrost, čast i ponos naših savremenika koji su odbranili Bosnu i Hercegovinu.



POSJETA POZORIŠTU MLADIH SARAJEVO

Predstava „Bajka o bajkama“

Učenici naše škole od II do V razreda u četvrtak 21.4.2022. godine u pratnji svojih učiteljica i nastavnika u prekrasnom ambijentu prepunog Pozorišta mladih uživali su gledajući divnu predstavu „Bajka o bajkama.“

„Mini Maus kreće u potragu za svojim prijateljem Mikijem. Na putu nailazi na Trnoružicu, Snjeguljicu i Pepeljugu. Zajedno kreću u avanturu oslobađanja svojih prijatelja i prinčeva iz tamnice u koju ih je zatvorila zla vještica Nera, a tu ih presreće strašni Vuk. ...“



Odična predstava, sjajna gluma, lijepi kostimi, scena, interakcija s publikom, emocija, pjesma, izuzetna poruka o prijateljstvu „Prijatelj je onaj koji ima srce, a ne onaj kojeg ne poznaješ-prijatelj s interneta koji stavlja srce na tvoju poruku.“ – samo su neki od komentara naših učenika koje čujemo u povratku.

Kako je protekla posjeta najbolje će opisati fotografije u galeriji.



Međunarodni dan maternjeg jezika

PROLJEĆE

U proljeće rano, dok sunce rumeno
obasjava usnuli grad,
veselo cvijeće, mirisom svojim
zamiriše kućni prag.

Dječija graja i cvrkut ptica,
proljeću daju čar.

Priroda se budi i
najljepši nam daje dar.

Povjetarac puhne sa trešnje stare,
behar rasprši na sve strane.

Pčelice vrijedne lete sa cvijeta na cvijet.

Ovaj svijet baš je lijep.

Oglečevac Ema VI-2

Povodom Međunarodnog dana maternjeg jezika učenici VI-3 su posjetili Institut za jezik. Tom prilikom su slušali predavanje na temu “Pisma bosanskog jezika”. Cilj predavanja bio je razvijanje svijesti o jezičkoj tradiciji, upoznavanje učenika sa teorijskim aspektima pisama, ukazivanje na grafemske specifičnosti uz istodobno razvijanje sposobnosti pisanja na ovim pismima – prvenstveno na bosančici. U uvodnim razmatranjima učenicima je skrenuta pažnja na važnost obilježavanja Međunarodnog dana maternjeg jezika. Istaknut je i značaj njegovanja jezičke i kulturne različitosti.

Nastavnica: Sanela Drinić



LITERARNI RADOVI

Šta ti je ta Bosna? Šta ti znači?

Pitali su me šta ti je ta Bosna? Šta ti znači? Dala sam im jednostavan odgovor.

Bosna Vam je nešto što leđi krv u žilama. Bosna Vam je inat. Bosna Vam je 10 lada što plovi obalama Evrope. Ali ne bi ona bila Bosna bez svoje djece, braće i sestara. I naravno, moja Bosna je svačija majka. Čuva me od loših ljudi i njihovih misli. A njeni ljudi... Kakav je taj narod? Mi smo tajna koja se dobro zna, ali čuva. Mi, u srcu i u duši ne damo nikom našu BiH da ruši. Svi Vam to mogu reći. A mogu Vam i reći da posjetite Bosnu, Unu, bilo koju bosansku rijeku. Slobodno se počastite njenom bistrom vodom koja sudbinu određuje. Kada to uradiš reci mi ti - Šta ti je ta Bosna? Šta ti znači?

Sajra Fazlić, VI-1



Majka

Kada odrasteš i odeš daleko, iz njenih ruku, kada te vjetrovi odnesu da započneš svoj život, kada kreneš graditi sebe, svoj dom, svoju sreću... Ne zaboravi onu koja te naučila svemu. Onu što te pridržavala pri prvim koracima. Onu što je bdila nad tobom cijele noći i čuvala te kao anđeo. Onu što se odrekla mnogo čega da bi ti bio ono što jesi danas, dobar čovjek. Onu čija ljubav nikada ne blijedi. I na vrhu, onu koja će te voljeti i u dobru i u zlu, stalno će biti tu. Onu što se zove majka.

Sajra Fazlić, VI-1

Majka

Ne bore se svi heroji
protiv požara,
Neki hrabro vode svoju
porodicu na
jednosmjerni let u svijet
nade.
Svijet obećanja koja su
okružena njenom
ljubavlju.

Univerzum napravljen
od talasa koji donosi
živote, zvijezda koja
ispunjavaju naše snove.
Ruka njena koja me je
uvijek milovala i koja mi
je uvijek pružala osjećaj
utjehe.

Njeno odsustvo je
najteža stvar koju čovjek
može doživjeti.
S nama je od prvog dana,
a sad mi kročimo u bijeli
svijet, svijet bez njenog
uzdaha.

Trebalo joj je vremena
da prihvati, nije htjela da
me vidi.

Stvari kojih sam se
najviše plašila.

A sada pokušavam da
budem kao ona,
Da idem njenim
koracima i da bude
ponosna na mene.


Za nju.

Moju prelijepu majku.
Murtić Sajra, VIII-1

POVRATAK U ŠKOLU

Tu smo. Tu smo opet. Nakon online nastave, vratili smo se na staro, na staro sjećanje i stare uspomene iz škole. Online nastava poprilično je ostavila tragove na nama, poprilično nas je zavukla u vrijeme iz kojeg se izvlačimo, izvlačimo, ali previše sporo, previše zahtjevno. Ma zamisli samo, po nekoliko sati ispred ekrana, ukočen u jednu poziciju. Nije donijelo ništa dobro, ništa korisno, a odnijelo je svu ljepotu škole. Odnijelo je ono nešto čemu smo se nekada i radovali, sada, te čari nemaju povratka. Jednostavno se ne vraćaju, i ako se vrate, neće biti kao prije. Neće biti kao ranije veselje tome. Ali, skloni na stranu tu propuštenu godinu i vidi da si opet tu. Opet imaš mogućnost uživati u ovome što je preostalo. Nije ostalo kao prije, nije kao one ljepote, ali ipak je tu. Ipak se vratilo, ipak smo vraćeni u klupe. Kao jedno. Kao cijeli razred. Pa za to stvarno vrijedi doći, vrijedi druženja. Sjeti se samo kako je bilo na online časovima, pa iskoristi ovaj povratak. Vjeruj mi. Zasigurno vrijedi. Zasigurno ćeš okušati tu sreću ponovo. Nije ono u potpunosti prošlo, nije da ne postoji, ali je malo zataškano. Malo su se ljudi udaljili od toga i vratili se starim navikama. Baš kao mi. Baš kao čarolija. Vidjeti opet sva ta lica, a da ne moraš preko maske, ma to je užitak. To je ono što se čekalo, a što je vrijedilo čekati. Samo čekaj. Budi strpljiv. Ima tu još toga. Još toga što se vraća. Što dolazi kasnije. Izgleda kao vječnost, ali zato je i vrijedno. Za ono što vrijedi isplati se čekati ma koliko to čekanje trajalo. Jer, na kraju, zapravo shvatiš. Shvatiš vrijednost. Nadoknadiš ono propuštaš dugo. Nemoj stajati na jednom mjestu i očekivati povratak sam od sebe. **POTRUDI SE. TI PORADI NA SVOM POVRATKU. JER NIJE TI JOŠ PUNO OSTALO. NIJE TI OSTALO JOŠ DUGO DO KRAJA, PA ISKORISTI I OVO MALO. JER I TO MALO, VRIJEDI PUNO**

Merima Šalaka VIII - 2



Likovni radovi: Lamija Omerović VII - 1

Predvečerje misli

Moje misli kao ptice pred večer za tobom
polete,
a ti zanosno gledaš drugome trag od pete.
Vidim ja, tvoji jesenji pogledi često oko
mene oblete,
što na moje misli slete,
odmah ih zaplete.

Čim misli i pogled svoj s mene skineš,
upitam se, da li mrziš me kad dišem,
da nećeš više da ti pišem,
ili ne voliš me više...?

Kao da je sve bio samo san,
opet kao da sam na svijetu sam.
Trag moj sa duše ti se polako skida.
Sekunde mi ne daš mira!
Zvono da te napustim počinje da svira.

Niko mi nije rekao da će ovako biti,
uzdah svoj za tobom više neću kriti.
Tvoj smijeh raskošni i ljubav tvoja, jedini
će da budu bitni.

Kad bi bar, samo ovu večer, svoju ruku u
moju htjela skriti...
Rijad Hadžić, VIII-1



Emana Kadrić

Zapitam se

Zapitam se nekada koje li je mašta
boje, da li tu djeca zaista sanjaju snove
svoje?

Zapitam se nekada šta je ustvari duga,
da li pored sebe imam pravog druga?
Zapitam se nekada zašto kiša pada, a
nikada ne ustaje. I da li hrabar čovjek
nikada ne odustaje?

Zapitam se nekad i o onom seljaninu
koji i zadnje žito melje, da li su to
ustvari njegove želje?

Zapitam se nekada kako je svaka mama
na svijetu bez mane i kako one kriju
vješto sve svoje rane?

Zapitam se nekada da li je oblak
šećerna vuna i zašto mi je ovih pitanja
glava puna?

Zapitam se nekada je li stvarno dobri
ljudi idu u raj i da li je zaista i ovoj
pjesmi kraj?

Lamija Zeba, VI-2



Bajrić Amna III - 1

Literarni rad učenice drugog razreda na temu „Šta dijete sanja?“ – za Konkurs literarnih radova učenika/ca osnovnih škola u organizaciji Bosanske knjige.

Šta to dijete sanja?

ZARIN SAN

Sanjala sam sinoć ja da me seka pozvala.

Šapatom mi reče:

-Hajde seko, sreće ti, da se malo igramo. Da mi graju pravimo.

-Ja ću seko brojati. A ti ćeš mi se sakriti.

U mom divnom, slatkom snu ja ti tražim seku svoju. Još bih je tražila, ali me zora omela. Ne mareći za moje želje zora je svanula i sve pokvarila. Za školu mama zove.

-Hajde ustaj, zlato moje!

Ustala sam rado, žurno. Ali ne bi baš slatko. Pogledah u svoju seku i izgubih radost svu. Nijeme su joj usnice. Malo hladne rukice. Meke, nježne nogice.

-Jao Bože, lijepog sna! Sve sam ja to usnila.

Sanjati bih opet htjela, ali veća mi je želja da mi seka progovori. Da ne budu samo snovi. Pa da skoči na nogice, da zaganja ona mene i zapjeva iz sveg glasa, da se Bosna zatalasa.


Ostviri mi Bože snove, moje male ruke mole!

Zahvalna ću tebi biti. Neću samo snove sniti, nego ću na javi ja biti sekom svojom ponosna. Neću samo željeti, već ću to i živjeti.

Neka pjesma, graja krene... Obraduj ti, Bože, mene!

ŠTA NOSI MOJA ĐAČKA TORBA?

Ja sam Lamija imam đačku torbu. Kupila sam je kada sam bila prvi razred. Bila je najljepša u izlogu dućana, bila je posebna. Kupila sam je i kada sam stigla kući poredala sam sve knjige i sveske u nju. Kada sam se probudila, sa mamom sam otišla u školu. To je bio poseban dan, to je prvi dan prvog razreda. Tada sam postala prvačić. Imam tu đačku torbu i sada kada sam četvrti razred. Ali kada sam bila prvi razred, ona nije imala mnogo znanja, a danas ima. Ona je moj iskreni i najbolji prijatelj. Sretna sam išla i vraćala se iz škole. Kada bih dobila lošiju ocjenu ona je bila tu da ne budem tužna. Đačka torba je posebna, ona mi je donosila sreću širila je ljubav i nikada nisam bila tužna kada sam imala nju sa sobom. Ja sam odrastala pa sam bila 1., pa 2., pa 3., a sada sam 4. razred



Često od odraslih čujem riječ RAT. Pomislim da druga djeca nemaju priliku da se druže sa svojim đačkim torbama. Ja želim da svi budemo prijatelji, da nema loših stvari i da svi imaju jednu lijepu đačku torbu. Sve te želje će mi se ostvariti. Ja ne želim nemir u svijetu, ne želim rat, želim mir. Mi smo svi jedna velika porodica. Hajde da i vi imate đačku torbu kao i ja.

Lamija Šabanović IV - 1



Na krilima znanja

Često čujemo kako se govori da vrijedimo onoliko koliko znanja nosimo u sebi i onoliko koliko smo spremni sa drugima podijeliti ono što znamo. Tek sada kada polako ulazim u svijet odraslih, shvatam koliko je to ustvari istinito. Naravno da vrijednost svakog čovjeka određuju njegova djela i ono što nosi u dubini svoje duše, ali mi nikada ne možemo dokučiti ljudsko srce i dušu, već vidimo samo ono što nam se dopusti i čovjek ne može preći tu granicu.

Koliko god nam neko bio blizak, nemoguće je pročitati njegove misli i osjećaje ako ih on ne želi podijeliti sa nama. Međutim, ukoliko znamo iskoristiti prave riječi u pravom trenutku, zasigurno ćemo otopiti led između nas i onoga kome želimo pomoći ili od koga očekujemo pomoć. Tu na scenu stupaju riječi koje su veoma dragocjene, ali to može znati samo čovjek koji zna izabrati pravu formulu i u datom trenutku izgovoriti baš one riječi koje će srušiti barijere između nas. Što više znanja usvajamo, lakše ćemo znati postaviti granicu između pogrešnog i ispravnog jer ponekad nije bitno ono što ćemo reći, već na koji način ćemo reći. Riječi mogu biti lijek za dušu, ali isto tako, ukoliko se ne znamo služiti njima, mogu biti i so koju ćemo staviti na nečiju ranu, i to potpuno nesvjesno. Onaj koji ne zna pravu vrijednost onoga što govori i koji jezik shvata olako, neće ni shvatiti svoje pogreške. Za mene su riječi poput dragog kamenja jer samo u rukama onog koji zna vrijednost dijamanta, one postaju dragi kamen, dok u rukama onog koji ne zna njihovu vrijednost, ne vrijede više od običnog kamena. Svaka knjiga koju pročitate naučit će nas nečemu novom i svaki lik kojeg upoznamo kroz čitanje dat će nam neku životnu lekciju koja nam može pomoći kada se najmanje nadamo. . Samo nas knjige mogu provesti stazama sasvim novih svjetova koji će nam udahnuti i pokloniti posebnu nit, a samo je do nas koliko ćemo iskoristiti sve ono što nam knjige nude. Riznica znanja zaista je ogromna i čini mi se da joj nikada ne možemo vidjeti dno i da se sa svakom novom lekcijom ona još produbljuje i postaje sve zanimljivija, a more lekcija koje možemo naučiti zaista je nepresušno. Svako roman, svaka pjesma, svaki broj i svaka lekcija nisu samo apstrakcija, već žive slike ukoliko ih mi u svojim glavama oživimo i shvatimo njihovu pravu vrijednost. Nijednu lekciju ne treba shvatiti olako i svaku treba prihvatiti kao nešto najvrednije što možemo dobiti u životu jer svaka u sebi nosi pregršt mudrosti koja će nas voditi stazama do istinske sreće. Što više znanja budemo nosili sa sobom tom stazom, našim životnim putem, koračat ćemo samouvjerenije, a ona će nas, bez imalo sumnje, dovesti do svjetlosti koja će obasjati naš um, a i naše srce.

Svaku lekciju koju naučim posmatrat ću kao kao biser i te bisere ću nizati na svoju ogrlicu sudbine. Biser po biser, nit po nit, svakim danom ona će postajati ljepša, a ja ću biti ponosnija. Na krilima znanja putovat ću dosad neviđenim krajolicima, hodati neistraženim stazama i iskusiti neviđenu sreću.

Ibrović Lejla, učenica VII 3



ŠTA SE NALAZI U MOJOJ ĐAČKOJ TORBI?

Približavao se početak školske godine. Jedan dan mi je otac rekao da idemo kupiti đačku torbu. Otišli smo u grad, razgledali izloge, a zatim ušli u jednu radnju. Bilo je raznih školskih torbi, šarenih i s mnogo lijepih boja. Odmah sam zapazila prelijepi ružičasti ruksak i rekla ocu: „E ovaj ću, ovo je moja omiljena boja.“ Bio je prelijep, pa smo ga kupili. Krase ga princeze iz mog omiljenog crtalog filma, a kada ga nosim, uvijek se osjećam kao jedna od njih. Ima mnogo pregrada u koje sam mogla smjestiti sve stvari za školu. Bila sam presretna jer mi se moj ruksak mnogo sviđao. Kada ga otvorim, osjećam se kao u bajci jer on nudi jedan poseban svijet prepun uspomena i znanja, a krije i poneku malu đačku tajnu. Da bih ga razlikovala od drugih, na njega sam zakačila privjesak sa svojim imenom. Njegova boja me svaki dan iznova čini sretnom. Sada me za njega veže mnogo sjećanja.

U njemu sam nosila prva slova, brojeve, prve pjesmice koje sam naučila i prve petice koje sam dobila. U njemu se nalazi zaista mnogo lijepih sjećanja koje me vežu za školu, drugove i drugarice. Bit će mi teško što ću se jednog dana morati rastati od njega, ali me raduje što će ostati mojoj sestri i činiti je sretnom kao što je i mene. Svako ima neku omiljenu stvar koju jako voli, a ja volim svoju đačku torbu ružičaste boje.

Perjan Hana IV-2





Poželjno je baviti se sportom u mom životnom dobu (rasprava)

Sport u tinejdžerskim godinama je jako bitan jer se upravo u toj dobi oni i razvijaju. Sport bi trebao da bude hobi ili profesija kojim se tinejdžeri bave, ali nažalost, to nije tako. Mnogi tinejdžeri će prije otići i sjediti u kafićima, nego raditi nešto kvalitetno za svoje tijelo. Na kraju krajeva, to je njihov individualni izbor.

Istraživanja na mnogim univerzitetima pokazuju da je veći procenat samopouzdanja kod tinejdžera koji se bave sportom u odnosu na one koji se ne bave njim. Mnogi u sportu nalaze lijek i bježe od problema, bar na kratko, kao što pušači nalaze lijek u cigareti. Još jedno istraživanje je pokazalo da su osobama suprotnog pola upravo privlačnije osobe koje se bave sportom. Za ovo nije ni potrebno istraživanje, to su činjenice. Bavljenje sportom je kvalitetno i lijepo iskorišteno vrijeme, a danas mnogima upravo i posao od kojeg zarađuju, iako su tinejdžeri. Kroz sport mnogi su izašli iz depresije, anksioznosti, mnogih psihičkih problema, a lijek u svemu tome su upravo našli u sportu. Trening i konstantan rad na sebi stvara i radnu naviku, što za krajnji cilj ima stvaranje jedne zdrave, normalne, psihički i fizički oformljene ličnosti. Pored toga što sport utiče na fizički razvoj osobe, on isto tako utiče i na psihički razvoj. Kroz sport dobijamo mnogo samopouzdanja, stvaraju se mnoga prijateljstva. Onaj ko se bavi sportom, normalno je za očekivati da neće krenuti stranputicom i pogrešnim putem, a o zdravstvenom stanju je suviše i davati komentar. Realno je za očekivati da takve osobe imaju više empatije, razumijevanja, normalnog i realnog rasuđivanja. Nauče da poštuju i sebe i druge, pogotovo ako treniraju neki timski sport gdje je trener iznad njih, pa ga smatraju autoritetom. Nažalost, ima i onih koji razmišljaju drugačije, pa će oni vrijeme, prije svega, umjesto za sport i sportske aktivnosti, iskoristiti sjedeći i igrajući igrice, opravdavajući svoj postupak činjenicom da je sport danas mnogo skup.

Svi ljudi su različiti, u tome i jeste bit i čar života. Normalno je da su neki ljudi vrijedni, neki lijeni, jedni vole sport, drugi ne vole, imaju različita zanimanja za nešto i tako se prema tome i treba postaviti. Ne treba osuđivati one koji ne vole sport, a onima koji vole sport pružiti punu podršku. Oduvijek su govorili: „Pitat će nas starost gdje nam je bila mladost“. Ovo znači - koliko pripremimo svoje tijelo u mladosti, toliko možemo očekivati od njega da nam vrati u starosti.

VELIKE RADINOSTI NAŠIH NAJMLAĐIH

Učenci I-1 i I-2 , osim redovne nastave u drugom polugodištu su obilježili pojedine važne datume. Proširili su svoja znanja, postali odgovorniji, družili se što je i bio cilj ovih aktivnosti.

21.3.2022.- Svjetski dan osoba s Downovim sindromom



Dan planete Zemlje - 22.4. 2022.

Učenci II- 1 razreda, u petak 22.4.2022. godine čas Moje okoline su posvetili Danu planete Zemlje pod sloganom „Čuvajmo našu prirodu da i ona čuva nas!“

Učenci su ljudima i prirodi poslali svoje poruke o važnosti čuvanja prirode da bi spasili Zemlju.

Probudi se veliki svijete, eko poruke šalje ti dijete:

- Sadi cvijeće, ne bacaj smeće!
- I drvo ima dušu. Novo drvo - novi život!
- Reciklirajmo otpad da majka Zemlja lakše diše!
- Naša pluća trebaju kiseonik i čisti zrak.



HIPPO OLYMPIAD 2022

SVJETSKO TAKMIČENJE U ZNANJU ENGLLESKOG JEZIKA

15 učenika naše škole (VI, VII , VIII razred) učestvovalo je u preliminarnoj rundi takmičenja Hippo English Olympiad 2022 u martu 2022. godine. Ukupno je učestvovalo oko 67 hiljada učenika iz cijelog svijeta ,a 10 posto najboljih su se plasirali u polufinalni krug.

Robel Šukalo VI-1 , Edina Ćosić VII-1 I Lejla Ibrović VII -3 su se plasirali u polufinale . Edina Ćosić je osvojila 3. mjeso na nivou naše države , sa osvojenih 80.5 bodova od mogućih 86, Lejla Ibrović sa 79 bodova je bila 7 u kategoriji HIPPO 2. , a Robel Šukalo sa 75.5. od mogućih 79 ušao među deset posto od 178 učesnika iz naše države u kategoriji HIPPO 1.

Robel Šukalo je i u polufinalnoj rundi osvojio 71 bod i zadovoljio bodovni uslov za plasman na evropske kvalifikacije, ali zbog ograničenosti broja učesnika u svakoj kategoriji (1 učenik iz BiH u kategoriji HIPPO 1) ,ipak nije pozvan u Italiju ove godine.

Učenike je pripremala nastavnica engleskog jezika Izeta Rahić.

CIVITAS

https://m.facebook.com/story.php?story_fbid=1059940664562361&id=100016393122858&sfnsn=mo

B Duže radno vrijeme za manje zdravstvene probleme

Poštovani stanovnici Brijesča, u narednom periodu u svojoj avliji očekujte naše učenike. Oni će uz vašu podršku pokušati realizovati projekat koji ima za cilj puno sedmično radno vrijeme (od ponedjeljka do petka) ambulante u Brijesču.

Brijesče, mart 2022. godine

- Nemojte odbiti razgovor sa našim učenicim
- Prenesite im svoja iskustva.
- Recite vaše prijedloge
- Svoje ideje ne čuvajte samo za sebe
- Budite naš partner u realizaciji ovog projekta

Želimo petodnevnu zdravstvenu uslugu u našem naselju-ambulantu Brijesče

Vaš partner,
JU OŠ „Behaudin Selmanović“

Očekujte: Ilmu, Nađu, Nejlju, Zejneb, Melu, Sa Selmu, Elmina i Elmira



5 NAJIMPRESIVNIJIH VODOPADA NA SVIJETU



Igazu vodopadi (Argentina/Brazil)

Ovaj kompleks, koji se nalazi na granici Argentine i Brazila, čini 275 vodopada. Kada se sa jezika Gvarani prevede, ime ovih vodopada znači velika voda. Na listi su svjetskih čuda prirode.

Viktorijini vodopadi (Zambija/Zimbabve)

Ovi vodopadi, široki čak 1.7 km, nalaze se na rijeci Zambezi. Naziv su dobili po engleskoj kraljici Viktoriji i nalaze se na UNESCO-ovoj listi svjetske baštine.



„Dim koji grmi“.

Lokalni naziv za ovaj vodopad (Mosi-oa-tunya) znači „dim koji grmi“.






Nijagarini vodopadi (SAD/Kanada)

Ime ovog vodopada je indijanskog porijekla i znači voda koja grmi. Na Nijagarinim vodopadima Nikola Tesla je učestvovao u izgradnji prve hidrocentrale i ovdje mu se nalazi spomenik. Ovi vodopadi se nalaze između jezera Iri i Ontario i predstavljaju prirodnu granicu između SAD-a i Kanade.

Anđeoski vodopadi (Venecuela)

Ovi vodopadi su smješteni duboko u džungli Južne Amerike, a pronađeni su slučajno 1933. godine, kada je pilot po kom su vodopadi dobili ime, naišao na njih tražeći rudna nalazišta.



Horsetail

Vodopad u nacionalnom parku Yosemite (SAD) koji se javlja povremeno, kada pada kiša ili se snijeg otopi na El Capitanu, granitnoj stijeni visokoj kilometar. Teče s visine od oko 619 metara, a svake godine, u februaru, sunčevi zraci padaju na vodopad pod takvim uglom da se odbijaju o granit iza vodopada, dajući vodi jarko crvenkastu boju, što stvara iluziju vatre ili tekuće lave.

OBILJEŽAVANJE SVJETSKOG DANA VODA



Danas je 22. mart, Svjetski dan voda. Ovaj datum službeno je proglasila Generalna skupština Ujedinjenih naroda je 1993. godine i tog dana širom svijeta se ukazuje na probleme vezane za vodu i vodne resurse, dodatno ističe važnost slatke vode i upozorava da se čista i pitka voda ne smije uzimati zdravo za gotovo. Zabrinjavajuće činjenice koje govore o samo 2% pitke vode u svijetu od sveukupne količine na planeti Zemlji su poražavajuće.

Svake godine naša škola obilježava važne eko datume kako bismo podigli svijest učenika o očuvanju prirode i njenih resursa.

Zemlja nas zove:

"Čuvajte klimu!

Ne dajte prirodu vatni i dimu!

Očuvaj vodu-Zemljno dijete, da dugo živiš ti veliki svijete!"



Svjetski dan voda na prigodan način su obilježili i učenici naše škole pod vodstvom nastavnice Hajrije Velić. Članovi kreativne Ekološke sekcije su dali svoj doprinos u obilježavanju ovog bitnog datuma i svojim nas radovima pozivaju da razmislimo šta voda znači za svakoga od nas. Različitim aktivnostima kao što su izrada panoa, ispisivanje poruka u cilju skretanja pažnje o presudnoj važnosti voda i izradom vlastitog grafičkog dizajna na ambalažama, podsjetili su sebe i sve nas koliko je važno pravilno upravljati ovim nezamjenjivim resursom.

U nastavku možete vidjeti radove koje su naši učenici vrijedno izradili. Hvala svim učenicama na ukazanom trudu i kreativnosti.

Naši ekolozi Vam poručuju: Budimo svjesni da voda znači život, borimo se zajedno za naše rijeke i vodotoke i sačuvajmo ih od štetnih projekata! Save Water - Save Future - Save Earth

DAN PLANETE ZEMLJE

I ove godine 22.aprila tradicionalno se obilježilo “Dan planete Zemlje”.

Učiteljice petih razreda naše škole Uglješa Elvira (V1) i Gujić Jasmina (V2) realizovale su ogledni čas iz predmeta Priroda upravo na temu “Dan planete Zemlje”.

Učenici petog razreda su nas pod vodstvom svojih učiteljica podsjetili koliko je doista važno poduzeti korake koji će nas dovesti do obnove i zaustaviti razornu ljudsku narav u uništavanju planete na kojoj živimo, ostavljajući dubok trag poguban za ekološke sisteme.

“Ožiljci” su svuda širom planete, moramo obnoviti Zemlju, jer za naš život potrebna je zdrava planeta Zemlja, kako bismo imali sigurnu egzistenciju, zdravlje i opstanak budućih generacija. Rijetki danas žive u suživotu s prirodom. Moramo to promijeniti.

Vrijedni učenici su svojim aktivnostima koje su realizovali na poučan i kreativan način sastavljanjem eko poruka, izradom eko plakata, kvizom do znanja o očuvanju prirode, ali i na zabavan način putem igrokaza, pisanjem akrostiha na temu “Čist okoliš” i kroz pjesmu “Spasimo planetu” zasigurno ostavili bar mali trag u očuvanju naše planete. Cilj časa bio je podizanje ekološke svijesti, a na samom kraju možemo zaključiti isto ono što i realizatori ovog časa - da biti ekološki osvješten i nije teško, te nam poručuju da čuvamo našu planetu jer je ona naš dom! Na kraju časa učiteljice su voditeljici Ekološke sekcije naše škole Hajriji Velić uručile ekološke edukativne poruke koje će nastavnica sa članovima sekcije postaviti u školskom dvorištu.

Nek je Zemljin dan, svaki dan !



Ne postoje putnici na svemirskom brodu Zemlja, svi smo mi članovi posade”. Lewis Thomas

ZAIMLJIVA BIOLOGIJA

OLIMPIJSKE IGRE U ŽIVOTINJSKOM SVIJETU

DISCIPLINA: Trčanje



Sigruna sam da znate da je najbrža životinja na svijetu – gepard (*Acinonyx jubatus*)! Ovaj pjegavi sprinter iz porodice mačaka prilikom lova može da trči brzinom od oko 115 km/h što je oko 32 m/s. To je oko tri puta brže od najbržeg čovjeka – Juseina Bolta !!!! Gepard ima izuzetno elastičnu kičmu koja se pri svakom pokretu savija i ispravlja, djelujući kao opruga koja potiskuje tijelo naprijed. Ima dobro razvijene mišiće, lagan skelet, duge noge (najduže u svijetu mačaka) i kandže koje se ne mogu uvući. Međutim ni on ne može baš dugo da izdrži u trci za plijen takvom brzinom. No, na njegovu sreću samo 60 sekundi mu je potrebno da savlada plijen.

DISCIPLINA: Plivanje

Lepezasta sabljarka je rekorder u vodi kao što je gepard na kopnu. Sa svojim ogromnim leđnim perajem, sličnim lepezi i dugim, izduženim i šiljatim tijelom predstavlja jednu od najinteresantnijih riba. Osim gracioznosti ona posjeduje i dobru vještinu plivanja. Prilikom lova ona pliva brzinom koja je za malo manja od one kojom gepard trči – oko 110 km/h. Na njenom meniju su tuna i skuša. Gornjom vilicom, koja je zašiljena u kljun, naglo i brzo prodire u jato i tako ubija plijen. Najbrže sabljarke žive u vodama Indijskog okeana.



DISCIPLINA: Skok udalj



Skok udalj je zanimljiva olimpijska disciplina, ali je još zanimljivija kada se izvodi 15-20m iznad tla. Te skokove svakodnevno izvode vjeverice. To je je za njih najjednostavniji, a ujedno i najsigurniji način kretanja kroz šumu koji im omogućava da izbjegnu bliske susrete sa predatorima. Pravi majstor u toj disciplini je crvena ili obična evropska vjeverica.



EKOLOŠKA SEKCIJA DAN RUŽIČASTIH MAJICA

Kada je u gradu Berwick srednjoškolac došao u ružičastoj majici koju je obukao u znak podrške majci oboljeloj od raka, doživio je vršnjačko nasilje. U znak podrške njegovi prijatelji su slijedeći dan obukli ružičaste majice i od tada je ružičasta majica simbol borbe protiv vršnjačkog nasilja.

Naša škola se pridružila globalnoj inicijativi borbe protiv vršnjačkog nasilja. Članovi Ekološke sekcije su na prigodan način obilježili ovaj dan uz poruku

„NASILJE UVIJEK ZASLUŽUJE NE“

Humanitarna akcija - “Paketić sreće za djecu iz Konjević Polja”

Učenici VI-2 odjeljenja i ove su godine uzeli učešće u humanitarnoj akciji “Paketić sreće za djecu iz Konjević Polja” koju već duži niz godina organizuje Udruženje učitelja Kantona Sarajevo.

“Volite djecu, jer oni su bez grijeha i žive da omekšaju naša srca i da nas upute.”

F.M.Dostojevski



SVE MOŽEMO ZAJEDNO!

U srijedu, 18. 5. 2022. godine je održana radionica sa roditeljima na temu „Čitanje kao preduslov za uspjeh učenika u školi“. Radionici su prisustvovala 23 roditelja I-1 odjeljenja, direktor Marevac Jasmin i pedagogica škole Šehović Elvira. Edukaciju je realizovala učiteljica I-1, Imamović Elvira.

Cilj radionice je razvijanje svijesti o važnosti čitanja za razvoj govora, zapažanja, zaključivanja, mašte i kreativnosti, te bogaćenje rječnika, što čini dobar temelj za uspjeh učenika u školi.

Radionica je takođe imala za cilj jačanje partnerstva između roditelja i škole, te međusobno upoznavanje i ugodno druženje sa roditeljima.

Jačajmo saradnju za uspjeh i dobrobit naše djece!



EKSKURZIJA



21. maja 2022. godine, 46 učenika OŠ „Behaudin Selmanović“ zajedno sa svojim razrednicima, Fazlagić Almom i Fehratović Selmirom, uputili su se na ekskurziju, putovanje koje svaki učenik sa nestrpljenjem iščekuje. To je završnica devetogodišnjeg školovanja, druženja, prijateljstva.

Okupljanje učenika je bilo od 07.00 sati, a polazak sa benzinske pumpe u Brijesću u 07.30 sati. Atmosfera u autobusu je bila odlična, kako kod učenika tako i kod svih učesnika koji su putovali, uključujući vozača i predstavnika Agencije Aide. Prva nam je stanica bio Travnik, grad što odiše ljepotom starine, gdje smo odmarali na Plavoj vodi, posjetili kuću Ive Andrića, zatim smo nastavili put do Jajca, gdje smo uživali u vodopadima Plive i Plivskim jezerima. Nakon toga zaputili smo se u Bihać, gdje smo se po dolasku smjestili u hotel „Blue box“. Ugodnom šetnjom upoznali smo centar grada.

Sljedećeg jutra smo se uputili u razgledanje znamenitosti grada Bihaća, gradski trg, slapovi Une, Fethija. Nakon ručka smo imali slobodne aktivnosti koje smo proveli u zajedničkom izlasku u grad. Nakon večere organizovana je disko večer gdje su učenici naše škole pokazali zavidne plesne korake i gdje smo svi naučili poneku novu pjesmu.

Sljedeći dan proveli smo u obilasku Nacionalnog parka „Una-Štrbački Buk“. Ovo područje predstavlja jedinstvenu prirodnu cjelinu u ovom dijelu Europe. Jedna ili jedina, kako bi u prijevodu bilo značenje imena ove rijeke koja spada među najčistije na svijetu, te će vas ostaviti bez daha. Nakon večere je organizovana disko večer gdje su se naši učenici opustili uz ples i muziku.

Slijedeće jutro odlazimo na doručak a nakon toga spremamo stvari i vršimo posljednje pripreme za povratak. Nakon doručka polazimo ka Sarajevu, takođe dobivamo pohvale od osoblja u Bihaću da su oduševljeni disciplinom učenika, kao i odnosom nastavnika.

Nakon posjete Ostrošcu dolazimo u Bosansku Krupu gdje je organizovan ručak za našu djecu. Fotografije su neizbježne, bliži se kraj ekskurzije. U poslijepodnevrim satima dolazimo u Banja Luku gdje obilazimo tvrđavu Kastel.

Dobivamo javne pohvale od gospođice Aide vezano za cjelokupnu ekskurziju. I mi izražavamo zahvalnost agenciji za odličnu saradnju.

Nakon dugog putovanja stižemo u Sarajevo u 21.30 sati.

Jedno prelijepo iskustvo, nezaboravno putovanje, sjećanje koje će zauvijek ostati zapisano kao jedna vrijedna stranica naše životne priče



Nastavnici: Alma Fazlagić i Selmir Fehratović

JU OSNOVNA ŠKOLA "BEHAUDIN SELMANOVIĆ"

IX -1



Učiteljica:
Edita Traka



Razrednik:
Selmir Fehratović



Salković Harun



Adnanović Armin



Brutus Elial




Bešlić Sajra



Alić Nejlja



Bajraktarević Hamza



Čavčić Emman



Turčalo Faris



Šabić Lejla



Krišo Aladin



Nurković Emira



Kaladža Ermin



Brajanović Farah



Gudić Rijad



Ruhočina Eman



Džuhro Ajla



Alić Hana



Šalaka Dalila



Smajović Ermin



Karavdić Edin



Šehović Dalila



Halilović Ernad



Ušanović Faris



Bećirović Nejlja



Elendić Mirnesa



Čamdžić Mirzet

MATURANTI GENERACIJE

2021/2022.

IX -2



Učiteljica:
Mubera Ibrahimović



Razrednica:
Alma Fazlagić



Alpa Larisa



Hanjalić Lamija



Husić Delila



Rustić Nedžma



Smajović Ahmed



Alhodžić Hamed



Jusić Asim



Karčić Emela



Mešan Azra



Murselović Amar



Kulovac Adin



Sarać Harun



Čurovac Rijad



Hadžić Imad



Šahinović Abdullah



Hodžić Amin



Suljović Sumeja



Džeko Sara



Omeragić Alem



Kartović Vedad



Pediša Amina



Suljović Ajša



Redžić Sajra



Šehović Ilhana



Bekto Meja



Idrizović Arnel



Salić Zejneb



ISKRICE MUDROSTI



Nikad ne slušajte one koji loše govore o drugima, a o vama dobro.

(L. Tolstoj)

Iskustvo je, bez sumnje, najbolji učitelj u životu, ali je školarina jako skupa.

(F. Sagan)

Ima ljudi koji žive bez ikakve svrhe i prolaze životom kao slamke rijekom – oni ne idu, njih nose.

(Seneka)

Ko hoće nešto da učini, nađe način; ko neće ništa da učini, nađe opravdanje.

(P. Pikaso)

Najgore knjige čitaju književni kritičari, oni koji moraju čitati sve. Lošim knjigama moraju se baviti i oni koji imaju prijatelje pisce. Najljepše je onima koji nemaju obavezu prema knjigama i piscima, oni mogu čitati samo ono što vole.

(D. Radović)

Ako pri svakoj prijateljskoj usluzi odmah na zahvalnost misliš, onda nisi darovao, već prodao.

(F. Dostojevski)